

**FANAL VITFE  
TOURNE VIRE  
LO PEP RENIONE**  
(Paz 3)



**FANAL**

**ZOURNAL INDEPANDANTIS RENIONE**

**FORS PA DOMOUN  
ALE FE VAKSINN  
AZOT**  
(Paz 4)

Sé Lorganizacion Popilèr po Libèr nout Péi - LPLP i fé sort ali - Ladrès : 3 ruelle du Pont 97427 Etang-Salé Les-Hauts  
Téléfonn : 0692 168 947 - Mèl : fanal@lorganizacion.org - Sitweb : <http://www.lorganizacion.org>  
N° 30 Sektanm 2021 - I tir in pe si papié sinonsa trap ali si nout sitweb - Lotorizasion : 2013/0497 - ISSN : 2266-9434 - Na 9 Lané i sort  
Dirèkter zournal : Bernard GRONDIN



# LIDANTITE RENIONE LA FENESANS TERLA SI LA TER LARENION

(Paz 4)

**LIDANTITE SA IN NA FER LA FENESANS NOUT PEP, NOUT LANG, NOUT MANZE  
NOUT MIZIK, NOUT KILTIR, NOUT KISANOULE ... LISTWAR LA FE LIDANTITE**

## KOZMAN RENIONE IN LANTROKOZ ESPESIAL

Kozman Rénioné in ribrik i donn la parol bann sitwayin ré-nioné po konèt zot lavi toulézour, kisa zot ilé vréman é kom an zot i wa lavnir Larenion po domin.

Zordi, nou sa koz in kou ek Giovanni GRONDIN, in plantèr, in militan indépandantis, li lé manm lo LPLP. Nou la trouv ali dann son bitasion koté Sinlé, na 5 kan li la komans défrish in bout térin dan léo. Li na in respé po la tèr, in gran respé po nout bann zansèt, po toutsat la batay po la libèrté nout péi. La Libèrté na in sèl koulèr po li. (Paz 2-3)





## KOZMAN RENIONE

### In lantrokos espésial ek Giovanni GRONDIN plantèr é militan indépandantis rénioné

**"Kozman Rénoné" po done la parol bann sitwayin rénoné po konèt zot lavi toulézour kisa zot ilé é koman zot i wa lavnir Larénion.**

**Fanal i sa koz in kou dosi lo koté bitasion avèk Giovanni GRONDIN in zène agrikiltèr sikoté lo Sidwès Larénion. Alor Giovanni koman ilé ou minm, rakont anou in pé ou bann parkour lavi po bann fanalèr konèt kisa oulé.**

**Fanal : Dan out métié bitasion kosa ou fé kom aktivité ?**

Léla minm, mwin lé militan indépandantis dopwi apepré inn kinzinn dané, é mon dominn amwin sé lagrikiltir. Mwin la travay kèt zané, dan lo milié agrikol oksidental pou apré mèt amwin amon kont dann in modèl lagrikiltir plis an nakor ek mwin minm, plis tradisionèl, ki respèk la natir. Po linstan mwin lé antrin mèt anplas, in karo tangor ek citron é ek sa biynto in park kabri ek volay lèspès.

**Fanal : Eské zordi lo métié plantèr lé dir é èt zène agrikiltèr lé fasil trouv térin ?**

Travay la tèr lé dir minm, li na son difikilté kom tout métié, mwin mi di pou pratik sa i fo ou lé pasioné. Isi Larénion lé konpliké trouv térin, pourtant pa la tèr i mank anou. Lo sistinm kolonial fransé, i fé tout po ke ou gingn pa trapé.

**Fanal : Eské néna in vré modèl dévlopman po bitasion Larénion ?**

Wi biysir néna, déza i fo nou repar si bann ras zanimo adapté a nout péi. Bann ras kapab riprodwir par zot minm, parey pou bann plantasion, i fo lé adapté a nout lanvironnman é ek nout tradision.

Bann bitasion noré 2 rol, inn nourri lo pèp é lot présèrv nout bann ras zanimo ek plantasion lokal. Bann bitasion i fo lé an sinbioz ek la natir, i fo lé 2 i travay dann minm sans. In bitasion i fo sé in lékilib ant nout manièr okip la tèr é koman la natir i fonksionn.

**Fanal : Kosa ou an pans bétonaz dosi bann tèr bitasion, ousa toulé zan bonpé latèr bitasion i foulkan ?**

I shagrinn amwin war sa, nou lé su in ti zil lé inportan présèrv la tèr é trouv in lékilib ant nout bozwin lozman é nout natir. Mé lo problinm sé ke na in

bonpe kaparèr isi kom lot koté la mèr ii viyn ek konplisité bann politik lokal kapay nout bann tèr, toutsa pou fé tourn zot sistinm groblan, zot sistinm kolonial.

**Fanal : Lo zour lindépandans kèl modèl dévlopman bitasion fodré mèt anplas po nourri nout popilasion ?**

In modèl ou nou lé kapab kontrol tout lé zétap nou bann prodiksion. In modèl i respèk nout natir, i respèk anou, ou i itiliz pa prodwi shimik, langré, lantibiotik, in modèl ou nou vann dirèk, pas pi par so lintermèdièr. In modèl ou lobzèktif sé nourri domoun é pa fèr profi, in modèl tradisionèl.



**Fanal : Kosa ou an pans bann miltinasionnal kapitalis fransé lapo fé lèspèryans plant lo "Chanvre" (zamal) dapré batman la lang i di po ranplas kann ou plito in bisnès organisé ?**

La kann sé in kiltir kolonial, ranplas ali par lo "chanvre" i shanz pa riyn pou nou rénoné. Nout priorité sé la souvrinnté alimantèr.

Bann miltinasionnal kapitalis na pwin zot plas isi Larénion, zot minm i tiyn anou dann malizé é i défann anou dévlopé.

**Fanal : Po ou plant aryink kann, néna ankor lavnir po bitasion Larénion ?**

La kiltir kann i angrès riynk groblan, depwui lépok lesklavaz ziska zordu, nou lé su in ti zil ou la mazorité lo bann méyèr tèr agrikol lé rézervé pou la kann, olié garantir nout sirté alimantèr.

Si lo but sé lindépandans alimantèr, lo kann na pi son plas.

**Fanal : Avan Larénion té promié po plantasion kafé, té, zèrnonm, létivèr, vaniy é dot, parèy po nout bèf Moka po ou akoz bann kolonial la tinn sa ?**

Mi pans ke lo sistinm kolonial, la vu lo danzé si bann kiltir fort valèr azouté, la tansion pangar rénoné i rouv lo zié dosu son kapasité fé parliminm. Ashakfwa in zouti isa dan nout sans sistinm kolonial i tinn ali.

**Fanal : Bonpé dan zot kwin la po rolans kiltir do riz ou pwindvi dosi-là ?**

Pou mwin sé in gayar zafèr, soman i fo nou instal ali dann in konba politik, pa folklorik. Aprésa lo riz tousèl lé pa in solision, i fo konbinn ali ek patat, maniok, mayi, lo grin.

I fo mèt an plas in vré stratézi agrikol.

**Fanal : Koméla in mod i koz aryink an "BIO" kosa ilé po ou sa ? Kan nou wa latèr lé anpoizoné, ou krwa néna ankor produi 100 % "BIO" ?**

Lo bio po mwin sé in mo tandans, sé tou. Mi itiliz plis lo term agrikiltir natirèl, tradisionèl.

Apré ek tout gomaz nout péi finn gingyé, o débu sra pu natirèl toutswit mé ek lo tan va rovnir si na in vré politik agrikol anplas.

**Fanal : Tout nout bann prodiksion lé aryink simiké, èské lé in danzé po la santé bann konsomatèr sirtou na pwin in trasabilité, koman bann prodwi-là lé itilizé ?**

Biysir lagrikiltir indistriyèl sé in danzé pou la santé domoun, parseke zot but sé lo profi.

San konté lo bann zagrikiltèr i gingn pa itilizé é i fé ninport kwé, i sirdoz po mié tié é o final sé lo pèp i gout.





**Fanal : Koman ou wa lorganizasion bitasion po lo dévlopman bitasionèr nout péi é po nourri nout popilasion dann bann zané i ariv ?**

Déza ropartaz la tèr, pouke lo maksimom domoun i pe travay dan lagrikiltir. Apré arèt ek bann sistinm kopérativ i mèt anlèr riyenk in ponyé domoun é i abiz si lo rès.

E sirtou inn vré kapasité prodwui parnouminm, ponouminm.

**Fanal : Avèk lo sanzman klimatik, koman ou wa la plas lagrikiltir po adapt ali èk bann sanzman-là**

Mi pans ke kan ou travay dan lo sans la natir ou adap natirèlman ek lo klima, parske ou ékout ali ou sa dan son sans.

**Fanal : Lotosifizans alimantèr koman ou wa sa, èské lé posib mèt anplas sa dan lo sistinm kolonial noulé dodan azordi ou fo atann lindépendans ?**

Lo sistinm kolonial noulé dan na okin lintéré ke nou lé otosufizan su lo plan alimantèr. Sinonsa na loutan té finn fé.

Fo domoun konsiantizé i mèt la min ansanm po dévlop in not modèl agrikol, in sistinm paralèl pou anshinn su lindépendans. Fo pa atann lindépendans pou komansé, sé toutswit i fo fé.

**Fanal : Avan 1946 Larénion té plant bonpé zafèr, té èsport plis ke i inport, si zordi noulé lé dépendan po tou sat i sort andéor é nou balans komèrsial lé dann fon kanal kisa lotèr ?**

Lo sèl koupab sé la Frans kolonial, li ve pa rénéoné lé kapab fé parliminm, toutsa pou li garantir son dominasion si nout péi.

**Inndé kozé vitfé po fini lantrokoz sanm ou :**

**Fanal : kosa ilé out bann pastan ?**

In nafèr mi inm vréman fer sé bonzay, sé in plézir pou minm swann in piédbwa dopi étan ti é évolié sanm li.

Pou mwin sé manière voyazé an restan la kaz é osi la apri amwin in ta zafer, kom la pansians, la rézilians é sirtou la permi amwin shanz ritm de vi plis an akor ek mwin minm. Apré in not pastan mwin néna sé batay kok, sa in tradision i tiyn amwin vréman akèr. andan la mi rotrov vréman mon rasinn é osi lo plézir swanié, fé grosir bann ti volay, vey azot grandir, prépar azot pou lo ron. Ala mon 2 pastan.

**Fanal : In zindépendantis rénéoné ou in moun la mark aou for minm ?**

Mwin va di mon papa, sé li la donn amwin lo gou mon péi, lo gou batay pou mon péi.

**Fanal : In landrwa i aral aou bonpé ?**

Na in landrwa mi inm in bonpe, sé dann fon Mafat. Pou mwin sé in landrwa vréman sinbolik, in landrwa i san la libèrté, i san Larénion .

Sé po mwin osi in modèl de se ke nout péi i devré èt, dan lo manir viv an larmoni ek la natir, dan la manière viv an rénéoné dan la sinplisité, lwin lo modèl konsomasion kolonial ke lé antrin tié anou.

**Fanal : Out pli bèl rèv domin po nout péi ?**

Mon pli gran rèv po mon péi, sé in priz konsians masiv de mon pèp su nout sitiasion isi Larénion e ke èk sa li rotrov son fièrté èt rénéoné. Toutsa po done ali la fors pou batay pou lindépendans nout péi. Lo zour mon pèp va rouv lo zié tout sra posib. Mon rèv war mon péi lib.



## FANAL VITFE TOURNEVIRE LO PEP RENIONE

**Aou kosa ou di ?  
Melondo, sinonsa Pastèk**

Lontan té di Melondo dan nout péi, sa i fé parti nout lidantité koz komsa, Pastèk sé in kozman i sort deor lé pa nout listwar, sé in fason di anou i fo koz kom zot, oubli nout lidantité.

Pistash sinonsa kakawèt, nou la touzour di komsa, arèt démont nout fason kozé. Kosa zot i di ? In bon rougay pistash - na in pe i di dakatinn - le rès nou lès po sat i ve manz kakawèt. Kom nou parl pistash, anou nou na lo pistash arbis osi, sa in gro piédbwa, konfonn pa li ek tomat arbis.

Nou na tamarin, sat nou fé losikré ansanm - tamarin béké sé lo méyèr i trouv pa partou - na osi tamarin linn, sinonsa lo piédbwa i trouv dan léo ... na minm in gran shomin.

Mazanbron, sa té in zelé té mèt si sisèt marmay (sinonsa si tété bann manman) po dékouraz azot kontinié ral andsu, na in pe lavé 6 zan té ral ankor sisèt sinonsa té tèt ankor. Nou apèl sa osi lalwès amer, na in rézon si nou di sa. Domoun deor la di anou apèl ali Aloe Vera.

Na fini ek in zatanta - zat an ta - sa nana Sinle, sa lé bon, sa i aranz la boush. I fé pans kèrbèf, sinonsa zanonn ... mé li lé pli fin, lodèr an mwin kom i di. Lo zanonn li minm - na in pe i apèl sa sapoti - domoun deor i inm zwé lamontrèr, la di anou apèl sa korosol. Konfonn pa sapoti ek sapot, na lo maron é na lo nwar, sa i fonn dan la boush kom inn krinm.

**Na désertin  
i préfèr goyav de Frans**

Sa in sindrom, in maladi kolonial, in maladi lo kolonizé 974. Toutsat i sort deor é lé gro, lé pli zoli lé pli gayar, lé méyèr lé not. In fason dévaloriz sat tanou.

Sa lé valab osi po bann poul de Frans, bann poul dolo kom i di, na zis laparans é ankor.

Sat tanou nou koné kosa na dodan, nou koné koman li lé fé, sirtou li lé méyèr po la santé, na pwin zormonn, lantibiotik ... prodwi shimik, la pa fors ali po grosir. In zafèr natirèl i respèk la natir, nout lanvironnman.

Lo sistinm kolonial léla po dégrinn nout lang, po barbouy nout kiltir, fas nout listwar é apèl nout bann zansèt Golwa.



# LIDANTITE RENIONE LA FENESANS TERLA SI LA TER LARENION

**Lidantité sa in nafèr la fénésans nout pèp, nout lang, nout manzé, nout mizik, nout kiltir, nout kisanoulé ... listwar la fé lidantité.**

**Lidantité la fé nout nasion, dan nout nasion na in sèl pèp, anou minm rénioné.**

Lidantité sé sat i rasanm anou, sé sat i donn anou in lekzistans, sé sat i donn anou la fors lèw dobout po la libèrté. Nout lidantité sé nout visibilité.


Anou rénioné afirm nout lidantité, batay po fé respèk ali sé mont nout kisanoulé. Nou lé pa dan in lozik lèsklizion, mé i fo nou lé nou avan brat ek not, sinonsa nousra touzour lot é zamé nou ... sé sat lo sistim kolonial i fé ek nou. Li fé tout po touf nout lidantité, po fé krwar anou rénioné i ekzis pas.

## I anserv in pèp kont in not pèp

Pwin lidantité, pwin pèp, pwin nasion. Sé posa osi dan bann tribinal kolonial isi Larénion, la zistis i rann "au nom du peuple français" alork nou lé dan nout péi, ousa na in pèp. Mé kom nout pèp lé pa ankor souvrin, in léta i koz po in not pèp i viyn désid tout po nou, po pa dir kont nou.

Lé sir i fo pa konfonn léta kolonial franse ek lo pèp franse, mé an minmtan sé bann moun franse i roprézant so léta la si la tèr Larénion. Sé so bann moun la i tiynbo partou dan nout péi. Mé ziskakan in pèp i pe rès konplis son léta. In léta swadizan la "Patrie des droits de l'Homme" mé la koloniz partou, la mèt domoun an esklavaz, la déport domoun, la kraz domoun, la vol sat domoun lavé, la vol zot péi ...

In pèp lé konplis, li lé koupab kom son léta.



Nou roviyn su nout lidantité. Na in bonpe rénioné, sirtou sat i viv an Frans, zot lé fièr, zot i rovandik, zot i kri an lèr, i port si zot lèstoma, ke zot i fé parti lékip 974. 974 azot minm, lé pi rénioné. Sinonsa dann in konfizion, bann moun la, isi kom an Frans i lèw Mavéli drapo kolonial, i lèw drapo franse.

Lé admandé si bann rénioné la, i koné vréman kosa i sinboliz, i ve dir vréman lo 974. Kèl lidantité zot nana, apar in lidantité kolonial, sa pa lidantité rénioné.

## 974 kod kolonial

Lo kod 974, sé nout matrikil kolonial, koman ou pe èt fièr port ali. Na in problim la. Poz aou lo kèstion - é mazinn koman lo sistim kolonial i rir kan i wasa, kan i antann sa - rouv out zié, mèt out péi, out lang, out kiltir, out drapo anlèr, arèt valoriz sat lo sistim la mèt dan ou tèt. Komsa out péi, aou minm va rès toultan amaré

dann fénwar.

Nou la parl drapo, parey swa ou lèw drapo out péi, swa ou lèw drapo 974. Aou minm koman ou pe fé avans out péi ek in drapo lé pa sat out nasion. Figaro i mank anou.

## Nout drapo anlèr, pa sa lé zot

Nout drapo nasional - drapo Larénion - avansa té lo drapo lo mouvman indépandans nout péi, na in listwar, li port lidantité nout nasion. Kan ou lé rénioné ou lèw ali.

Lèr larivé po avansé, po fé, arèt perd lo tan, arèt gaspi out lénerzi.

Pou finir na dir, nout lidantié sé in garanti pou domin, si nou mazinn in lavnir pou nout péi. Lidantité rénioné pa sat lo 974. Mann aou sé kwé out lidantité, aprésa lèw la tèr, marsh dobout, po libèr out péi.

974 sé figaro zordi, avan li tinn nout lidantité alon tinn ali nou minm partou.

# FORS PA DOMOUN ALE FE VAKSINN AZOT

**Nou la touzour maziné é la fini par arivé nout libèrté i foulkan. Lo 12 zilié 2021 prézidan kolonial franse la rann obligatwar vaksinasion kont korona po désèrtin katégori métié é in pass sanitèr tousala té mi anplas lo 21 zilié 2021 apré in vot par bann Dépitè franse po done ali in rokonésans. La pankor fini, atann azot nora dot lwa po tak nout libèrté, ala kan in pèp lapèr pran son libèrté lé kapouné dann gob kolonial astèr.**

Dann bann lwa kolonial bann konbatan po lindépendans i rokoné pa bann lwa po nout péi pars lé ilégal lokipasion lafrans isi Larénion, épisa lo moun lé lib swazi kosa lé bon po li, i dwa respèk la libèrté sakinn.

Zot i wa èk lobligasion astèr néna dé kan i frot avèk ziskatan wa zanikrosh, inn lé po lo vaksinn, lot lé kont, i prétan si oulé pa vaksiné ou pé pi rant ousa ou vé dan bann zandrwa néna in tralé domoun ou sra minm konsidéré kom bébèt, ala koman korona la fini par diviz nout sosiété lo mond.

## Rèspèk la libèrté swazi

Lo zafèr vaksiné ou pa vaksiné, koman léta kolonial franse èk in

Prézidan diktatèr i pé obliz bann rénioné vaksine azot san zot konsantman, eské bann vaksinn-là lé fiab i sar pa poz traka dan lo tan dosi la santé rénioné, pars ban rodèr la santé i koné pa bann mové léfé si lo tan koman sra dan lo kor domoun. Po fé vann zot bann vaksinn zot la po mèt la présion dosi bann gouvèrnan mondial po di fo vaksine tout moun vitman po fini èk korona, koman anminm pa 1 an i mèt in vaksinn vitfé anplas, alor bann maladi kom Sida, Kansèr, Diabèt é dot i fout minm pa trouv in romèd.

## Fé tansyon bann marsandaz zèlu figaro kolonial

Kom bonpé i fé pa mèt vaksinn, sirtou domoun frazilè sosialman, lo bann kolonial wa trouv tout mwayin po vaksine domoun èk bann ti kontra san landomin é dot promès parèy zélèksion frodé po fors nout popilasion mèt lo pikir.

Nout mésaz po léta kolonial franse, obliz pa nout pèp vaksine ali, lé azot war kosa lé bon po zot, la fini lo tan i pran rénioné kom zanimo, si domin i ariv bann konplikasion fodra bann rèsponsab kolonial i rann anou kont dovan in tribinal espésial.